

Doc. 8. Hu Zongxian's Proposal (Source: Hu Zongxian 胡宗憲, *Haifang tulun* 海防圖論 [Illustrated treatise on coastal defense]. In *Bingyuan sibian* 兵垣四編 [Four chronicles on military affairs], section on coastal defense (*haifang* 海防), comp. by Zang Maoxun 臧懋循. 1621, 5a-6a. National Archives of Japan Digital Archive).

廣福人通番當禁論

倭奴擁衆而來動以千萬計非能自至也由內地奸人接濟之也。濟以米水。然後敢久延。濟以貨物。然後敢貿易。濟以向導。然後敢深入海洋之有接濟。猶北陲之有奸細也。奸細除而後北虜可驅。接濟嚴而後倭夷可靖。所以稽察之者。其在沿海寨司之官乎。稽察之說有二。其一曰稽其船式。蓋

國朝明禁。寸板不許下海。法固嚴矣。然濱海之民以海爲生。採捕魚蝦。有不得禁者。則易以混焉。要之雙桅尖底。始可通番。各官司於採捕之船。定以平底單桅。別以記號。違者燬之。照例問擬。則船有定式。而接濟無所施矣。其二曰稽其裝載。蓋有船雖小。亦分載出海。合之以通番者。各官司嚴加盤詰。如果採捕之船。則計其合帶米水之外。有無違禁器物乎。其回也。魚蝦之外。有無販載番貨乎。有之。即照例問擬。則載有定限。而接濟無所容矣。此須海道嚴行設法。如某寨責成某官。某地責成某哨。某處定以某號。某澳束以某甲。如此而謂通番之不可禁。吾未之信也。